

PROCEDEMENTO PARA A ELECCIÓN DE REITOR/A DA UNIVERSIDADE DE VIGO E DE REPRESENTANTES NO CLAUSTRO UNIVERSITARIO

(Aprobado pola Comisión Electoral en data 23-01-2014, e modificado o día 08/02/2018 e o día 31-01-2022)

Á vista de que, con posterioridade á última modificación do presente procedemento, que tivo lugar o 8 de febreiro de 2018, entraron en vigor diversas normas que inciden no mesmo, sinaladamente, os novos Estatutos da Universidade de Vigo e o Regulamento Electoral Xeral (REX), ambos do 2019, xunto cos regulamentos sobre administración electrónica e a implementación das funcionalidades técnicas derivadas dos mesmos, novidades todas elas ás que este instrumento debe axustarse, así como co obxecto de clarexar a aplicación do REX en relación coas vindeiras eleccións a reitor e a representantes do claustro, a celebrar conxuntamente no 2022, e en resposta, finalmente, a diversas peticións de interpretación a tal efecto, os membros da comisión electoral consideran necesario actualizar o presente procedemento, así como estender o seu ámbito de xeito que inclúa non só as eleccións a reitor/a, senón tamén a representantes no claustro universitario (reguladas por un acordo da comisión electoral de 17 de febreiro de 2012), quedando redactado do xeito seguinte:

DA ORGANIZACIÓN DAS ELECCIÓNS

Artigo 1

1. O reitor/a será elixido pola comunidade universitaria mediante elección directa e sufraxio universal libre e secreto, por un período de catro anos e con posibilidade dunha soa reelección, entre os catedráticos/as de universidade en activo que presten os seus servizos na Universidade de Vigo. Será nomeado polo órgano competente da Xunta de Galicia.

2. O Claustro Universitario está integrado por 251 membros que, excluindo os natos que indica o artigo 12.2º dos Estatutos, se elixirán nos diversos sectores da comunidade universitaria, mediante sufraxio universal, libre, igual, directo e secreto, coa seguinte composición numérica dos sectores indicados:

- a) 128 representantes do profesorado doutor con vinculación permanente á universidade (51 %), dos que se restarán os/as xa membros natos,
- b) 22 representantes do restante persoal docente e investigador (9 %)
- c) 63 representantes do estudantado (25 %)
- d) 38 representantes do persoal de administración e servizos (15 %)

Artigo 2

Nas eleccións a reitor/a, o voto será ponderado por sectores, e corresponderalle ao profesorado doutor con vinculación permanente á universidade o 51%, ao resto do persoal docente e investigador o 9%, aos estudantes o 25% e ao persoal de administración e servizos o 15%. A ponderación farase sobre o total de votos a candidaturas validamente emitidos.

Artigo 3

Será proclamado reitor/a, en primeira volta, o candidato/a que acade o apoio proporcional de máis da metade dos votos a candidaturas validamente emitidos, unha vez feitas e aplicadas as ponderacións correspondentes. Para o devandito cómputo non se terán en conta

os votos en branco.

Artigo 4

Se ningún/ha candidato/a a reitor/a acada o apoio necesario para ser elixido/a en primeira volta, procederase a unha segunda elección á que só poderán concorrer os dous candidatos/as que tiveran máis votos ponderados na primeira volta. Nesta segunda volta será proclamado reitor/a o candidato/a que obteña máis votos ponderados.

Artigo 5

No caso de non presentarse candidatos/as á elección de reitor/a que cumpran os requisitos esixidos, ou non poder ser proclamado electo ningún dos candidatos/as por non ter acadado o apoio que exige a normativa, continuará en funcións o anterior titular, que deberá convocar de novo a elección de reitor/a no prazo de tres meses.

Artigo 6

Nas eleccións a representantes de claustro, cada elector/a só poderá dar o seu voto como máximo a un número de candidatos/as equivalente ao 70 % ou porcentaxe máis próxima ao número correspondente a cada sector ou circunscrición electoral, de acordo coa táboa 1 do anexo ao REX, onde A é o número de representantes elixible por cada sector e circunscrición electoral, e B o número máximo de candidatos e candidatas aos que poderá dar o seu voto cada votante. Así mesmo, para promover a paridade entre xéneros nos órganos colexiados, cada elector/a poderá votar como máximo o 60 % das candidaturas dun dos xéneros, determinado sobre o número de candidatos/as máximo previsto no apartado anterior, de acordo coa táboa 2 do anexo do REX, onde A é o número de representantes para elixir por cada sector e circunscrición electoral, B o número máximo de candidaturas ás que poderá dar o seu voto cada votante e C o número máximo que se pode votar para un dos xéneros.

Artigo 7

1. Consonte o artigo 25 dos Estatutos da Universidade, a Comisión Electoral estará composta por:
 - a) O Reitor ou un vicerreitor ou vicerreitora nomeado polo reitor, que a presidirá.
 - b) O secretario/a xeral da universidade, a efectos de fedatario con voz e sen voto, que será o seu secretario/a.
 - c) Doce membros elixidos polo Claustro, dos que tres serán do profesorado doutor con vinculación permanente á universidade, tres doutro persoal docente e investigador, tres do alumnado e tres membros do persoal de administración e servizos.
2. Os membros da Comisión Electoral serán elixidos polos claustrais do respectivo sector por un período de catro anos, agás o alumnado, que o será por dous.

Artigo 8

1. Consonte o artigo 9 do Regulamento Electoral Xeral, entre outras competencias, en particular, correspóndelle á Comisión Electoral regular a elección do reitor/a e a representantes no Claustro Universitario, debendo elaborar o calendario, censo e

procedemento electoral da mesma. É, ademais, o órgano competente para coñecer e resolver todos os problemas e dúbidas que se poidan presentar nestas eleccións.

2. Toda a documentación electoral remitida pola Comisión Electoral aos centros deberá enviarse, na medida en que sexa posible, en formato electrónico.

Artigo 9

1. O censo electoral de cada sector estará exposto no taboleiro electrónico oficial e, opcionalmente, no taboleiro electoral do centro respectivo.

2. A Comisión Electoral establecerá para cada elección o prazo de reclamacións sobre admisións ou exclusións, que non poderá ser inferior a cinco días hábiles a partir da data da súa publicación.

3. As reclamacións formularanse perante a Comisión Electoral, mediante escrito razoado dirixido á presidencia, a través da sede electrónica ou presencialmente nas oficinas de asistencia en materia de rexistro de calquera dos tres campus. A Secretaría Xeral comunicará o procedemento no momento de publicar os censos provisionais.

4. As resolucións desestimatorias da Comisión Electoral sobre as reclamacións ao censo serán notificadas directamente ás persoas interesadas, e en contra delas non caberá a súa revisión.

5. Os censos electorais definitivos faranse públicos inmediatamente despois do remate do período de reclamacións e, cando menos, dez días hábiles antes da data das eleccións, no taboleiro electrónico oficial e, opcionalmente, no taboleiro electoral do centro respectivo.

6. Exceptúase destas eleccións ao alumnado de centros adscritos á Universidade e ao alleeo á Universidade de Vigo participante en programas de intercambio. O alumnado pertencente ao Programa de maiores só poderá participar nas eleccións a reitor/a.

Artigo 10

1. Para ser elector/a en cada sector deberán cumprirse os requisitos esixidos no artigo 3 do REX, segundo corresponda.

2. Ningunha persoa poderá ter a condición de elector/a en dous ou máis sectores de representación distintos, nin dentro dun sector en dúas ou máis circunscricións electorais. As persoas que estean na situación anterior deberán, durante o período de reclamacións ao censo electoral, presentar escrito optando polo sector no que desexen participar na votación. En caso de non haber escrito, a Comisión Electoral fará a adscrición prevalecendo o sector de persoal de administración e servizos sobre os restantes, e o sector de profesorado doutor con vinculación permanente ou o sector do resto de persoal docente e investigador sobre o sector de estudantes.

3. A adscrición por circunscricións rexerase polo disposto no artigo 15 do REX.

4. 4. Cara as eleccións a representantes no claustro, onde cada centro da Universidade de Vigo constitúe unha circunscrición electoral para os sectores de profesorado doutor con vinculación permanente á universidade e alumnado, a comisión electoral distribuirá os membros que deban ser elixidos entre os diferentes centros de forma proporcional ao número de membros do sector correspondente, garantindo un mínimo por centro. Asemade, a comisión electoral decidirá verbo dos agrupamentos de centros co fin de constituír as circunscricións electorais para o sector do restante persoal docente e investigador, de xeito que se garanta unha adecuada correspondencia entre o número de membros do sector nas

circunscricións e o número de representantes no claustro. Finalmente, no caso do persoal de administración e servizos constituirase unha circunscrición electoral única, con independencia do lugar no que teña o seu destino.

CONVOCATORIA DE ELECCIÓNS

Artigo 11

As eleccións a reitor/a serán convocadas polo reitor/a coa debida antelación para que teñan lugar antes da finalización do seu mandato. De non facelo así, serán convocadas pola Comisión Electoral. En todo caso, terán o mesmo calendario electoral que as eleccións para a renovación total de representantes no claustro, que serán aprobadas previamente polo Consello de Goberno.

Artigo 12

De conformidade co artigo 13.2º dos Estatutos, un terzo do Claustro poderá propor a convocatoria de eleccións a reitora ou reitor. A presentación da proposta provocará a convocatoria do Claustro Universitario no prazo máximo de dez días. A súa aprobación, que requirirá dous terzos, suporá a inmediata convocatoria de eleccións a reitora ou reitor e ao Claustro Universitario no prazo de trinta días.

Artigo 13

1. A convocatoria das eleccións a reitor/a deberá conter polo menos as seguintes indicacións, aplicables así mesmo, *mutatis mutandis*, ás eleccións a representantes no Claustro:

- a) data de exposición pública do censo electoral
- b) prazo de reclamacións ao censo
- c) data de publicación do censo definitivo
- d) prazo de presentación de candidaturas
- e) data de proclamación provisional de candidatos/as
- f) prazo de presentación de reclamacións á proclamación provisional de candidatos/as
- g) data de proclamación definitiva dos candidatos/as
- h) prazo de celebración da campaña electoral e data da xornada de reflexión
- i) data de votación
- j) data de proclamación provisional de candidato/a electo ou, de ser o caso, de candidatos/as para concorrer á segunda volta
- k) prazo de presentación de reclamacións á proclamación provisional do candidato/a electo ou de candidatos/as para concorrer á segunda volta.
- l) data de proclamación definitiva de candidato/a electo ou de candidatos/as para concorrer á segunda volta
- m) data de votación en segunda volta, se fose necesaria
- n) data de proclamación provisional de candidato/a electo en segunda volta, se fose necesaria
- o) prazo de presentación de reclamacións á proclamación provisional do candidato/a electo en segunda volta, se fose necesaria
- p) data de proclamación definitiva do candidato/a electo en segunda volta, se fose necesaria.

2. A convocatoria farase pública no taboleiro electrónico oficial e, opcionalmente, no taboleiro electoral de todos os centros e dependencias universitarias.
3. Salvo circunstancias excepcionais apreciadas pola Comisión Electoral, as eleccións deberán ser convocadas unha vez finalizado o prazo ordinario de matrícula do curso correspondente, e as votacións deberán ter lugar en días lectivos.

PRESENTACIÓN E PROCLAMACIÓN DE CANDIDATOS/AS

Artigo 14

1. Poderán presentar a súa candidatura as persoas que ostenten a condición de elixibles, segundo cada caso, conforme ao establecido no artigo 1 deste procedemento e no artigo 4 do REX.
2. As candidaturas presentaranse mediante escrito dirixido ao presidente/a da Comisión Electoral no prazo establecido no calendario elaborado pola devandita comisión, a través da sede electrónica ou presencialmente nas oficinas de asistencia en materia de rexistro de calquera dos tres campus.
3. O réxime relativo ás candidaturas será o establecido para cada caso no artigo 27 do REX.

Artigo 15

1. A Comisión Electoral, transcorrido o prazo de presentación de candidaturas, efectuará a proclamación provisional de candidatos/as, que se fará pública no taboleiro electrónico oficial e, opcionalmente, no taboleiro de anuncios dos centros e dependencias universitarias e na páxina web da Universidade.
2. Transcorrido o prazo de reclamacións establecido no calendario electoral, a Comisión Electoral fará pública a proclamación definitiva de candidaturas. As reclamacións formularanse perante a Comisión Electoral, mediante escrito razoado dirixido á presidencia a través da sede electrónica ou presencialmente nas oficinas de asistencia en materia de rexistro de calquera dos tres campus. A Secretaría Xeral comunicará o procedemento no momento de publicar os censos provisionais.

Artigo 16

Os/as candidatos/as a reitor/a unha vez proclamados/as poderán propor, ata oito días naturais antes da data de votación, o nomeamento dun/ha interventor/a, por cada mesa electoral e sector, seguindo a tal efecto o disposto no artigo 32 do REX.

CAMPAÑA ELECTORAL

Artigo 17

1. O equipo de cada candidato/a a reitor/a e as liñas xerais do programa deben ser coñecidos antes do inicio da campaña electoral. Presentaranse a través da sede electrónica ou presencialmente nas oficinas de asistencia en materia de rexistro de calquera dos tres campus.
2. A campaña electoral comprenderá aquelas actividades desenvolvidas polos/as

candidatos/as proclamados/as, en orde á captación de sufraxios nos centros e dependencias da Universidade, e se rexerá polo disposto no artigo 29 do REX.

3. Os decanos/as e directores/as das mencionadas dependencias darán as facilidades pertinentes, senque iso supoña suspensión das actividades ordinarias.

XUNTAS E MESAS ELECTORAIS

Artigo 18

Haberá en cada centro unha Xunta Electoral composta por:

- a) O decano/a ou director/a do centro, que a preside.
- b) O secretario/a do centro, que actúa como secretario/a da mesma.
- c) Un membro do persoal docente e investigador, outro do persoal de administración e servizose un estudante, pertencentes á respectiva xunta de centro, designados por sorteo público, así como os seus suplentes.

Artigo 19

1. A Comisión Electoral determinará, á vista do número de electores/as, o número e a colocación de mesas electorais. En todo caso, haberá unha mesa electoral na Reitoría na que votarán polo menos os electores/as do sector de persoal de administración e servizos que desempeñen as súas funcións nese edificio e nos edificios correspondentes ao resto dos servizos centrais.

2. A formación, organización e a constitución das mesas electorais se levarán a cabo segundo as disposicións dos artigos 30 e 31 do REX aplicables aos procesos incluídos no ámbito do presente procedemento.

Artigo 20

1. Cada mesa electoral estará composta por un membro de cada un dos catro sectores electorais que figuran no artigo 2, designado por sorteo público realizado pola Xunta Electoral do centro de entre os que figuran no respectivo censo electoral. O seu presidente/a será o correspondente ao sector de profesorado doutor con vinculación permanente á universidade. Cada membro da mesa terá o seu suplente, designado do mesmo xeito que o titular. No momento da constitución da mesa electoral, os seus membros elixirán o que deba actuar como secretario/a, reflectíndose esta circunstancia na acta de constitución.

2. A mesa electoral da Reitoría estará integrada por tres membros do sector de persoal de administración e servizos aos que lle corresponda votar nesta mesa, designados por sorteo pola Comisión Electoral. Cada membro da mesa terá o seu suplente. O presidente/a será o máis antigo da mesa. No momento da constitución da mesa electoral, os seus membros elixirán ao que deba actuar como secretario/a, reflectíndose esta circunstancia na acta de constitución.

Artigo 21

1. A Xunta Electoral do centro nomeará a todos os membros das mesas electorais aos que se lles notificará individualmente a súa designación e o comunicará á Comisión Electoral aos efectos de tramitar, no seu caso, as axudas de custo correspondentes. A composición de

cada unha das mesas electorais farase pública en cada circunscrición electoral sinalada no artigo 6 do REX.

2. A condición de membro dunha mesa electoral é obrigatoria para os nomeados. As causas xustificadas que impidan o seu exercicio serán estudadas pola Xunta Electoral.
3. A condición de candidato/a proclamado/a e de interventor/a é incompatible coa de membro dunha mesa electoral.
4. Quedan excluídos de formar parte de calquera mesa electoral os membros da Comisión Electoral.
5. A mesma mesa electoral actuará nas eleccións a representantes do Claustro e do Reitor.

VOTACIÓN E ESCRUTINIO

Artigo 22

1. As papeletas de votación, que incluírán as casillas “a favor” e “en contra” no caso de candidatura única nas eleccións á reitoría, ou formula equivalente, se axustarán polo demais ao indicado no artigo 33 do REX, e serán facilitadas pola Secretaría Xeral, xunto cos sobres e as actas de escrutinio, aos equipos de dirección dos centros, agás no caso da mesa electoral da reitoría, que se lle facilitarán ao presidente ou presidenta da mesma. Os equipos de dirección dos centros entregaranlles a citada documentación aos presidentes e presidentas das mesas electorais.
2. A celebración da votación se levará a cabo segundo o indicado nos artigos 34, 35 e 36 do REX.
3. A emisión de voto será directa e secreta, rexéndose polo disposto no artigo 37 do REX.
4. O dereito de sufraxio é persoal e intransferible.
5. Non se permitirá en ningún caso nin a delegación de voto, nin o voto anticipado, nin o voto por correo.

Artigo 23

1. Rematada a votación, o presidente/a da mesa declarará iniciado o acto de escrutinio, que será público, e non se suspenderá, agás causa de forza maior, consonte o disposto no artigo 38 do REX, finalizando segundo o disposto no artigo 39 do dito regulamento.
2. Finalizado o escrutinio, a mesa electoral publicará inmediatamente os resultados por medio dunha acta de escrutinio, que deberá conter os apartados que sinala o artigo 40 do REX, formalizándose segundo o indicado no dito artigo e sendo remitida á Secretaría Xeral para a súa publicación no taboleiro electrónico oficial e, opcionalmente, no taboleiro de anuncios do centro.
3. Logo de redactar a acta de escrutinio, a mesa electoral preparará e tramitará o expediente electoral segundo o indicado no artigo 41 do REX.
4. Tras recibir os expedientes electorais das mesas electorais e as actas de escrutinio, levarase a cabo o escrutinio xeral dos votos emitidos en cada elección, segundo o indicado no artigo 42 do REX.

Artigo 24

1. Nas eleccións a reitor/a, recibidos os resultados de todas as mesas, calcularanse os coeficientes de ponderación que corresponda aplicar ao voto a candidaturas validamente emitidos en cada sector, co fin de darlle o valor correspondente segundo as porcentaxes

fixadas nos Estatutos da Universidade de Vigo.

2. O coeficiente de ponderación de cada sector calcularase con catro cifras decimais, onde V equivale ao número total de votos válidos a candidaturas:

- a) Coeficiente do sector de profesorado doutor con vinculación permanente á universidade: $0,51 \text{ V/VA}$, onde VA equivale ao número de votos válidos a candidaturas emitidos polo sector de profesorado doutor con vinculación permanente á universidade.
- b) Coeficiente do sector doutro persoal docente e investigador: $0,09 \text{ V/VB}$, onde VB equivale ao número de votos válidos a candidaturas emitidos polo sector doutro persoal docente e investigador.
- c) Coeficiente do sector de estudantes: $0,25 \text{ V/VC}$, onde VC equivale ao número de votos válidos a candidaturas emitidos polo sector de estudantes.
- d) Coeficiente do sector de persoal de administración e servizos: $0,15 \text{ V/VD}$, onde VD equivale ao número de votos válidos a candidaturas emitidos polo sector de persoal de administración e servizos.

3. O número de votos ponderados correspondentes a cada candidatura en cada sector calcularase multiplicando o número de votos obtidos pola candidatura nese sector polo coeficiente de ponderación dese sector. O número de votos ponderados totais correspondentes a cada candidatura calcularanse sumando os votos ponderados desa candidatura en cada sector.

Artigo 25

1. Unha vez calculados os votos ponderados totais correspondentes a cada candidatura, segundo o indicado no artigo anterior, a Comisión Electoral procederá a proclamar provisionalmente ao reitor/a conforme o establecido no artigo 3. De xeito equivalente, rematado o escrutinio xeral, procederá a proclamar provisionalmente as persoas candidatas electas a representantes no claustro universitario, segundo o indicado no artigo 54.6º do REX, aplicándose para os casos de empate e de suplencia os seguintes parágrafos do dito artigo.

2. Unha vez proclamados de xeito provisional os resultados, abrirase o prazo de presentación de reclamacións de acordo co calendario elaborado pola Comisión Electoral, a cal resolverá sobre as mesmas, proclamando definitivamente ao reitor/a e ás/ós representantes no claustro universitario.

3. Se ningún candidato/a a reitor/a obtén o apoio proporcional de máis da metade dos votos a candidaturas validamente emitidos procederase conforme o establecido no artigo 4 ou, de ser o caso, o artigo 5.

Disposición adicional.

O disposto neste procedemento desenvolve, respecto das eleccións incluídas no seu ámbito material de aplicación, o contido dos Estatutos da Universidade de Vigo así como do REX, tendo ambos carácter xeral e subsidiario respecto dos asuntos aquí non regulados e que atinxan aos ditos procesos electorais.

Disposición derogatoria.

Queda derogado o acordo da comisión electoral de 17 de febreiro de 2012 sobre o procedemento para a elección de membros do claustro universitario.

Disposición final: entrada en vigor das modificacións.

Sen prexuízo da súa eventual ratificación polo Claustro da Universidade de ser preciso, os cambios introducidos no presente procedemento entrarán en vigor tras ser aprobados pola comisión electoral e serán de aplicación, en particular, aos procesos incluídos no seu ámbito material que se convoquen a partir de tal momento.